

元人文集 上卷

元
代
史料
叢刊
初編

黃山書社

牧庵集卷二十四

元

姚

燧

撰

神道碑

武略將軍知弘州程公神道碑

由程氏世爲太原祁縣人燧考歐陽公表唐相系曰程
出風姓顓頊生稱稱生老童老童生重離其後世掌天
地之官裔孫封程爵伯洛陽上程聚則其地也至周休
父失其官守以諸侯入爲王司馬及銘文簡公琳碑則
云莫盛于唐宗分爲七廣平中山濟陽靈洗其三則皆

祖魏安鄉侯昱而系表皆無是言惟昇上三四世而止
豈今居太原祁者或廣平中山分歟其可系則自其高
大父主簿祁政生曾大父禮武科取官忠翊郎至右武
大夫守隆州冒陳金兵以歿宋愍節死賜錢百萬歸葬
其鄉大父天祐醫以自業卒葬文水考達以太祖建龍
旗九斿卽位之年丙寅至戊寅兵金之年爲十三年年
二十餘與兄通弟進倡豪傑來歸完保其鄉爲提控爲
監軍鎮撫軍民都彈壓管民總管銀符甲午金亡之明
年還鄉民五百亦占屯籍詔易金符位總管上發平陽

河中京兆民二千屯田鳳翔實僑客其地城中猶荒錯
荆棘逐虎狼則田疇非立芟舍伐株櫟芟蒿萊不可以
入錢鑄以觀銓艾夏夏其難哉矧西則秦鞏未臣行金
正朔南大散關距宋百里北山饑盜縱橫日夕相寇殺
丙申又爲征蜀所塗師旅去來館餽之須十以率之屯
供億七鳳翔纔三後鳳翔民稍集資屯猶六焉爲之七
年當歲壬寅以終其賢其能其勤其勞有盧昭文摯墓
碑言公諱介福字伯祥故事父死子得嗣爲歲辛亥宋
四川制使余玠潛遣偏裨火絕棧道木閣身將大軍攻

圍興元城方孤圍公將屯兵五百從都元帥都爾蘇入
援及絕無從得塗值三人自圍所亡歸許貫其死令導
由他山刊木出陳倉玠以爲自天而下焚圍宵遁其年
憲宗卽位凡中士列聖符節告身盡收之官明年入覲
還金符仍位總管上屯田鳳翔制許專殺有王姓民毆
兄至死旣就逮其親請鄉鄰善公者懷白金二鎰來貨
曰死非他人吾長子也今又以季子償死吾誰與爲養
惟哀而全之公却金曉曰虎狼獸耳父子兄弟且不相
噬人而賊殺同氣其不仁也暴甚虎狼此而不誅何以

正是邦之數敗天倫者竟尸之市尋岐雍民家奴皆蜀
俘百十爲曹相燭亡歸公悉止還朝廷聞之率以爲反
遣特濟來按事連其主將盡殲之公曰民奴羣逃主何
與知惟當罪首亂者由是惟誅七人孟待制嘉之因扁
其堂曰明恕戊午憲宗進討西川乘輿入由鳳翔多其
津梁館餽廩修治豐潔賜金幣五白金爲兩百五十
世祖立極中統庚申收上符節告身如先朝以前屢入
覲潛藩熟公還金符至元四年丁卯以平陽河中屯民
爲軍假公子松長千夫將戍成都其還鄉民五百入傳

官公武略將軍知弘州下車渠桑乾水灌田五十里新
州解以示安榮一刮夙昔苟簡之弊饑封民民所食木
膚草實上之中書得發廩以贍械素豪猾之干治以病
民者于市懲衆擢曹徵君子汝弼教授以師是邦使士
知學其古人所謂糾姦示惡流恩褒善者類歟十年四
川上松戰功制問故符安在對以弘州仍佩制解傳松
滿秩還岐二十有六年己丑年六十七冬雨木冰羣鳥
噪集庭樹三日公弗善之覽鏡入奩前諸子訓曰吾平
生無他長人惟俯仰無忤愧人耳若曹可篤學學自修

則在家在邦不患無孝忠之聞也惟求善惡在已有無
無以人過干毀譽而輕愠易喜語訖而卒實十一月二
十一日也二月從塋于其考鳳翔之召亭鄉兆次兩夫
人皆前卒謝君四十一年富察君二年四子長松次檜
八藩副都元帥虎符皆不祿悌彬業儒孫五人萬里秦
山殤壽山業儒文演陝西萬戶虎符文饒未仕女十人
皆歸名族其天質仁厚剛方孝友明信哀孤敦宗民奴
禮士者有陝西賈提學某墓誌銘銘曰
猗歟將軍賴基父勲田岐雍郊千耦其耘人初小之治

寄是府勢若異然此客爾主後一歲中校其賦輸爾財
四三此六七居無事而農我艾我鉦警將一旅從寇入
出憲廟兵宋師由褒斜百須餽供應求咄嗟帝用嘉止
幣金實篚其爲龍光疇與儔比于後世皇詔其子松將
屯千夫戍鄰祚叩其半屯民雍岐之界私公刺弘足乃
騰驥乃渠桑乾膏潤孔多履道以仁越度用苛視民之
飢猶已紓背亟請于朝發廩以食滿秩養安十五餘年
靈烏告凶得氣之先觀古史臣爲人紀善雖一行言亦
取立傳志在行後尚鑒用勸子孝孫慈乃祖考思惟懼

平昔有美棄遺託諸能言金百昭垂走非其人彬爾來
卽拜手過求先德爲述誅婉而章其言洋洋匪資礎龜
疇遠闡揚

譚公神道碑

譚在周千七百國之一子爵幽王之譚大夫衛碩人之
私譚公皆其遺苗後世子孫遂以國姓史代有人其居
德興之懷來高祖而上不得其世曾祖信金鎮防壽州
千夫長祖伯全家累千金父資榮以徇北功皇元帥左
都監虎符寄治交城遂令其縣削平盜賊賢士逃亂者

多往爲依公生以歲戊寅髫年入學穎慧彊敏拔異羣
兒成人兆緒疑疑則見十五綜經緯史講貫精熟會課
朔望每魁諸生爲交牧盧帥所奇以女妻焉軍中得書
則馳送之故其家多積至萬卷國初爲制皆世其官父
死子繼兄終弟及或父兄存將傳子弟者亦惟命故考
府君以元帥左都監交城令推其弟資用卒公以嫡長
嗣爲十九年矣太宗之八年丙申州縣守令上皆置監
動惟國言公不能也而受成說譯人慮其見欺乃私與
國言者遊日薰而月聒之滿歲而悉能精曉他日郡議

不資用譯應務無滯人悉異其不學而至朝廷置斷事
官于燕曰司瓊林園之臺人人則曰行臺府檄公往計
事歸請省諸工料費橫取民者府僚便之舊文谷水分
溉交城爲平牧郭帥所遏專利其縣民累訟之終不見
直躬造大府爭之郭帥少公恃爲父執至或肆詬公不
爲報惟理譬折彼遂際屈至今其水縣蒙其利杖部民
持吏短長恣爲非法者幾死民惠且威俄入覲因中書
耶律公面陳初乙未料民州縣率以無產僑客入籍用
示其庶及賦下悉避逃徙責徵實存官無所取稱貸買

胡困不能償迫改立約以子爲母譬以牝生牝牛十年
千頭滋息日增帝爲哀之制許貰其逋懸無鉤見民公
私之負三年勿徵子母對止亡民能歸其復三年縣境
大甦而鄰民曰吾獨不居交城耶州縣守令益害其能
請督一府遠輸之糧于平陽及至又移輸京兆仍守其
出比盡而返數年由是縣民困劇鄰矣憲宗壬子復大
料民公削其逃徙兼其貧弱雖捐戶數故是縣差不艱
窘歲甲寅世祖淵龍平大理還始入見嘉其舉趾凝重
出話慎詳留居藩府官而不名以其弟山阜代爲縣遣

邇臣出使必以公偕先是分封世祖以京兆田戶寡益以懷孟且詔總天下之兵遂置經略司于河南宣慰司從宜所于關西行部于秦州漕運司于衛安撫司于邢盡遣諸軍屯田戍邊首淮尾蜀以休秋冬士馬往來之勞東西數千里道不拾遺中侯屯庶翕然歸心歲丁巳宗親間之遂解兵柄他王遣阿勒達爾至京兆大集汴蜀兵民之官下及管庫征商之吏皆入計局爲條百四十二文致多方且曉衆曰惟劉萬戶史萬戶兩人罪請于朝蓋謂忠順公丞相忠武兩公也自餘我到專殺虐

焰薰天多迫人于死世祖遣庫濟青左丞與公來臨無
與鈞考而彌縫其間時通動息藩府會明年世皇身至
帝所命下而事始緩猶仗兵民諸官凡昔所置諸司皆
廢公歸丁妣郝太夫人艱藩府奪哀起之世祖始分兵
南征俾公治懷歲旱復鑿唐溫渠引沁水河內諸縣中
統建元制褒其賦性寬和練習政事以爲懷孟路總管
明年入覲賜金符四年換虎符訟隨日決曾不留獄教
民植業桑疇麥陂稻塍芡湖果圃苧區水輪步船無有
遺利或用致饒民其臧獲侯克寬孫宥等家男女數十

人引蕭讓爲府史升知事積官運使按察使至元二年
罷世侯省懷孟衛輝兩總管入彰德以公爲同知無幾
時官嘉議遷河南路總管兼府尹明年奔元帥府君喪
交城中書不聽終制迫懷泣職瀝水疊石爲岸梁木其
上歲易腐敗規爲樓十二楹覆之慮其財擅取帑力輕
用民得請戶曹而始究工上下列肆月收傭值資府公
須參政楊公紀績于碑官少中平灤路總管旣至疾歸
七年散階例降二等與職上下官奉議司農少卿尋進
嘉議京兆總管兼府尹者一年改陝西四川道提刑按